

O aydiyal ko mipalalay i takowanan

Kaniharan to dafadafak maratar kako a lomowad, yo talipa'lal kako to dafak i, caay konika sekak no talamangawan a 'ayam ta talipa'lal ako, o lalahcien a tatayalen ato aydiyal ko mipalalay takowanan. Patemek no kalotamdaw i iraay aca ko caay kalecad a misarocodan a miharateng to tatayalen.

O roma a tamdaw i mangalay a malasingsi. Nawhani, i faloco' naira i ira ko tata'angay a lalahcien a tayal(使命)ato aydiyal(理想) to sapalatamdawaw to rarem, saka sa'icel saan caira a mitilid a minanam to saka lasingsiaw. O tayal no malasingsiay i tadakakangodo^an, nawhani, pakayni i pasifana' naira i malatamdaw ato matongal ko fenek no wawa i picodadan, hatiniay a roray naira a pasifana' to mitiliday i tada o hahemeken ita.

O roma a tamdaw i mala ising. Nawhani, hina adada i mamang a matiya, saka hina paising haan no ina ciira ta manga'ayto ko tireng a mato'as. Yo paising i pipaisingan iraay ko makafahay a fayi milalicay to icowaay ko adada no tatirengan saan, ta nengnengen no ising ko adada, o yanan ta awaayto ko adada no tireng. Maharateng niira ko hatiniay a demak

i 'orip niira, saka o lalangatan no faloco' niira a malaising, nawani, matenako niira ko pidama no ising to adada niira, orasaka, pakani i malaisingay a tayal a paca'ay.

O roma a tamdaw i mala maomahay. Nawhani, adihay ko miterekan no mato'asay to nano to'as a sera^, ano caay kaomahen i mela^ o omah no mato'asay, orasaka, ci faloco' ko wawa a mala maomahay. Talacowa caay kafana' to tayal no maomahay, nika ano ci faloco' a mala maomahay ko 'orip i, caay ka ngodo^ a minanam ta ira ko kinaira no nikaomahan. Ira ko sawal no ci tanengay, sowal sa, "Nanay lipahak a mipanay ko talalosa'ay a mifolsak to sapaloma a tamdaw. Oya talalosa'ay a mitatoy to sapaloma a talaomah i, o lalipahak a mi'orong to rorong no panay a minokay." Hai, malalokay a tamdaw i caay ka cahiw ciira.

O matiniay a kasasiroma a aydiyal no mita i o nga'ayay a ma^min, o saka lemed no niyah. Orasaka, Ano ira ho ko lalahcien a tayal i caayto ka ala^ ko fafoti'en, nawhani, mapalal no hatiniay a aydiyal ko foti'.

(文章大意 僅供參考) ※字數限 200 字

我的理想叫醒我

有人想當老師，理想就是培育後輩，讓他們在求學的過程中獲得很好的教育，將來成為一位稱職的老師。有些人成為醫生。他在生命的過程裡，憶起這些過往的事，起了當醫生的念頭。有些人當農夫，是祖先留下很多的農田，倘若置之不理，真是太可惜。

這些各不同的理想，不論是什麼工作都是有意義的。倘若心中有個理想，每天就朝著這個方向走，為此每天無法入眠，雖然入睡片刻，卻被這種理想所叫醒。

Kafafalifalic no palapatan no mihcaan

Cecay a mihca^, ira ko kasi^nawan, ira ko kacanglahan, ira ko kacihrangan, ira ko kafarawfawan. Sepat ko kasasiroma^ no palapatan to cecay a mihcaan.

Ano kasi^nawan i, sali^tec sa ko romi^ad, sa'amamokot sa ko tamdaw to si^naw, mana'ay a masadak. O mato'asay i'a:yaw, i kasi^naw no mihcaan i, o kasoy ko taringoan no paro^ no loma'. Aniniay a tamdaw mahaento a malalen a mirongo, nika o dingkiay a taringoan ko sapiringo no aniniay, caayto kalecad ko 'orip anini.

I kacanglahan no mihcaan, caay kasi^naw caay ka fa^det ko romi^ad, tada kanga'ayan no kalotamdaw a miholol. O pinalengaw i safangcal sa ko lengaw, hofahof sa ko papah, malikat ko nika celak no rohayon no pinalengaw.

I kacihrangan no mihcaan i, tada fa^det ko romi^ad mawarak no cidial ko tamdaw, sapiyan sa ko matayal to romi^ami^ad. O masafaloco'ay i kacihrangan i, o 'alo'alo^an, pingingoyan, ano ca i lidong no kilakilangan, nawhani itira ko kanga'ayan a misasa^mel, mifasaw to fa^det no cidal.

Ka farawfawan no mihcaan, o kaolahan ako a palapatan no mihcaan

konini, nawhani, sa^mel ko romi^ad kanga'ayan no tamdaw a miholol a talacawacawa. Nengnengen i ma^rid i safohcal sa ko tingting no hinaliti^ matiya ci soldaay ko ^nar i ma^rid. I si^naway a lotok i tokos mafayal ko papah no kalokilang, ira ko kahengangay, ira ko maloloay, ira ko kandaway kahirahira no cengel, matiya o ci fodoyay ko lotok to makapahay a fodoy, kakahemekan a nengnengen. O roma^ sato, i kafarawfawan a romi^ad i tata^ang ko fali, marasras ko maftaay a papah no kilang ato hana. 'Aloman ko misalamaay to fasiyaw i papotal, malalifet a misalama^ to fasiyaw, nima^ a fasiyaw ko satakaraway a mafer? Nengnengen ko fasiyaw no pafasiyaway i, matiya o maferay a 'ayam i kakarayan, kitakarawan ko cahid, toekan no mata a minengneng.

Ano kasi^nawanto ano kacanglahanto ano kacihranganto ato kafarawfawanto i, o pakakotakotay no Kawas to saka nga'ay no serayan saka nga'ay no pinalengaw ato saka nga'ay haca no tamdaw a ma^orip. Itini haca i kafafalifalic no palapacan no mihcaan i, tongal tongal sato ko mihcaan no mita o tamdaw, faha:l sato a mato'as ko 'orip.

(文章大意 僅供參考) ※字數限 200 字

一年四季之轉換

一年有冬、春、夏、秋不同的季節。

冬季天氣冷，過去常生火取暖，現代是用電器產品代替。春季氣候宜人，植物生長茂密，花開的格外亮麗。夏天悶熱，到河床游泳，或樹蔭底下納涼，避開太陽。秋天是我最喜歡的季節，風不僅把花樹的葉子吹落於地，也把風箏吹到九霄雲外，似如鳥兒在空中遨翔。寒冷的山麓，樹葉呈現枯竭現象，不同的色彩，猶如穿上彩色的新衣，令人奪目。無論是冬、春、夏、秋，都均衡地蓬勃發展。